



Minggu, 15 Mei 2022
Ogen: Esekiel 38: 1-17



Perkakas Tuhan



Renungenta wari enda ngerana kerna nubuatan Esekiel nandangi bangsa Israel i ja kecibalna tupung e enggo merap marpar. Tapi dungna ipepulung mulihi ku taneh perpadanen. Kenca ia enggo pulung kerina reh me Gog nerang bangsa Israel. I bas permulaan nubuatan enda, ikataken maka Tuhan si makeken Gog ras pasuken-pasuken arah erbage-bage bangsa guna nerang Israel. Engkai maka bage? Engkai maka ipake Tuhan bangsa sideban guna nerang bangsa pilihanNa jine? Erkiteken doni enda lenga nandai ras meteh ise Tuhan situhuna. Maka Tuhan erdolat nandangi kegeluhen manusia I doni enda. Adi terjadi cilaka man bangsaNa labo erkiteken kinilangsupen Tuhan i bas njagai bangsaNa tapi ekiteken kinilanggiten bangsaNa e njagai kebadianna arah dosa-dosana nari. E maka Tuhan banci saja alu kuasaNa mpekeke sada bangsa si atena erkuasa i doni enda guna jadi perkakasNa i bas mereken sada persinget ras ukumen man bangsaNa jine. Gelah bangsaNa e mulih kempak Ia janah tetap ngarapken Tuhan i bas kerina dampar kegeluhenna. Tuhan si merentahkensa man Esekiel guna inubuatken man Gog, ndigan waktu nerang, i ja nari rehna serangan e, ise-ise saja si ikut nerang. Si enda ncidahken maka Tuhan e erdolat nandangi doni enda maka banci ia ngaturken kerinana. Tuhan nerang Israel, e nuduhkan man bangsa-bangsa sekelewetna ise kin gelah itandaina Tuhan si badia e dengen erkuasa. Selaku kalak sitek, nggo arusna sijagai dirinta ras kebadiannta arah kuasa dosa si banci saja ngerintak kita gelah ndabuh ku bas dosa. E maka tetap kita ipersingeti. Tuhan banci saja make ise pe jadi perkakasNa guna mpersingeti kita, banci temanta meriah, serayan Tuhan, pengurus Moria ras sidebanna. E maka ula kita minter merawa, tersinggung di kune kita ipersingeti. Buat nilai positifna, maka keleng kap ate Dibata e aku, maka ipakekenNa kerina kalak guna mpersingeti aku gelah la ndabuh ku bas kuasa dosa. Adi lit denga persinget ertina lit denga keleng ate. Perdiateken ras iktkenlah persinget si mehuli e gelah geluhta mejuah-juah. Keleng ate Dibata tangkas arah persigetNa.